



Sesida dals

Communitgà ils

Protocol nr.

6 da favrer 2018

7 da favrer 2018

74

Incumbensa Casty

concernent la finanziaziun da curs da la lingua da segns per forzas spezialisadas che lavuran cun uffants/giuvenils cun impediments d'udida

Resposta da la regenza

Uffants e giuvenils che han in impediment da l'udida vegnan promovids en la scola populara cun differentas mesiras da la pedagogia speziala. Actualmain profitan 35 uffants e giuvenils (da la vegliadetgna prescolara fin al 20. onn da vegliadetgna) da l'audiopedagogia, 3 da quels dovan ina promoziun en la lingua da segns en quest connex. Ultra da quai profitan 11 scolaras e scolars cun in impediment da l'udida da la scolaziun speziala integrativa e 3 da quels dovan ina promoziun en la lingua da segns en quest connex. Ulteriuras 2 scolaras e scolars cun in impediment da l'udida profitan d'ina scolaziun speziala separativa en ina instituziun chantunala da scola speziala resp. en ina instituziun da scola speziala spezialisada extrachantunala. En la scolaziun speziala separativa vegn la lingua da segns duvrada sche necessari. Tut en tut poi vegnir constatà che las scolaras ed ils scolars che han in basegn da promoziun en la lingua da segns resp. en la furnaziun bilinguala survegnan ina promoziun adequata.

La furnaziun supplementara da las personas d'instrucziun e da las personas spezialisadas tenor l'art. 56 da la lescha davart las scolas popularas dal chantun Grischun dals 21 da mars 2012 (lescha da scola; DG 421.000) fa – tenor l'art. 59 da la lescha da scola – part da l'incarica professiunala e da las incumbensas principalas da las personas d'instrucziun. En il rom da la relaziun d'engaschament è la regulaziun da la furnaziun supplementara chausa dal purtader respectiv da la scola regulara sco er da las instituziuns da la scola speziala. Quels fixeschan tenor l'art. 63 da la lescha da scola in minimum da furnaziun supplementara che sto vegnir absolvi mintga onn e che na dastga betg sutpassar diesch mezs dis da curs per personas d'instrucziun engaschadas a temp cumplain. Las instituziuns ch'èn responsablas per la scola reglan la surpigliada dals custs dals curs e da las spesas. Contribuziuns

chantunalas a la furmaziun supplementara pon vegnir pajadas mo per expensas per ils curs ch'èn vegnids declerads sco obligatorics.

Tenor la pratica vertenta vegni fatg diever – per la furmaziun supplementara da las personas d'instrucziun e da las personas spezialisadas en lingua da segns – da curs u da furmaziuns supplementaras che tegnan quint da la situaziun e che vegnan purschids da differentas organisaziuns. En vista al dumber pitschen da scolaras e scolars pertutgads ed en vista al basegn da furmaziun supplementara ch'è pervia da quai relativamain pitschen sco er different tut tenor la situaziun, resguarda la regenza quai sco cunvegnent ch'ils purtaders da scola decidan davart la necessitad, davart il gener e davart la dimensiun d'ina furmaziun supplementara da las personas d'instrucziun e da las personas spezialisadas, tegnend quint da la situaziun, q.v.d. partind dal basegn da promoziun da las singulas scolaras e dals singuls scolars. Ord vista da la regenza n'èsi perquai betg util da declerar sco obligatorics curs da lingua da segns.

La regenza è medemamain da l'opiniun da las sutsegnadras e dals sutsegnaders ch'ina furmaziun supplementara sistematica da las personas d'instrucziun e da las personas spezialisadas en lingua da segns è impurtanta per instruir adequatamain scolaras e scolars che han in basegn spezial da promoziun pervia d'in impediment da l'udida. La finanziaziun da la furmaziun supplementara en lingua da segns per personas d'instrucziun e per personas spezialisadas po e duai vegnir garantida dals purtaders da las scolas regularas e da las instituziuns da la scola speziala sin basa da las disposiziuns legalas concernent la furmaziun supplementara. Ina regulaziun da nov da la finanziaziun na s'impona betg. Ils purtaders da scola vegnan però sensibilisads per l'impurtanza da la lingua da segns en la scola populara e rendids attents tras l'uffizi per la scola populara ed il sport cun ina circulara davart lur obligaziun concernent la furmaziun supplementara.

Sa basond sin questas consideraziuns propona la regenza al cussegl grond dad acceptar l'incumbensa.



En num da la regenza

Il president:

Dr. Mario Cavigelli

Il chancelier:

Daniel Spadin